

特279


314



皇德徧敷國運增隆
佛日恒輝法輪常轉

始







未受印可灌頂者不許
讀本經如來聖禁戒故

阿吽鉢囉婆勃馱
輪王佛定中所現
玄現章

王齋相定
中炳現
如正輪

玄現章序品第一

爾時教主天宮可天權者在於娑婆世界日輪上處
目白臺白金色淨滿精室為令一切衆生卽目入玄
住一字頂輪王佛勝瑜伽得宿命智自知本體本地
毘盧遮那頂輪王佛權化文殊師利普見如來分身
入一切如來頂生三摩地從白毫放白金色光明輪
照十方微塵界無不徧照於其光中諸佛所加持故
離惑離著離染離時離量離分別離三世亦離三界
不思議解脫能徧入佛智於其光中佛神力加持故
十方微塵世界現一毛端亦復十方微塵數無量佛
入一毛孔自身成本尊身定中顯現密嚴蓮華藏界
坐於一切如來妙菩提場從一一毛孔放白金色光

於其光中化現微塵數佛佛佛平等為度諸群品故
從一一佛身亦復放白光其光無量無邊不可思議
十方諸佛菩薩人天六趣一切大衆攝取於其光中
皆悉顯現權者定中會上時教主與十方一切如來
入光明三昧為度衆生故放種種色無量大光明輪
觸其光得光明覺王三昧教主為度末世惡有情故
入大悲光明覺王三昧故不依經經文現定中無盡
不立義義自窮玄妙無極卽是輪王三摩地所加持
更不繙經卷復不加人意獨被佛意離念得佛慧故
一時闕得一切如來密藏玄門玄義刹那顯現而明
菩提樹筆走現神通游戲名曰玄現章佛所命如是
玄哉玄現一切如來頂法

玄現章示現名號品第二

阿吽鉢囉婆名號者法爾所現故佛神力加持字故
卽是一切法身如來名號卽是一切報身如來名號
卽是一切應身如來名號卽是一切化身如來名號
卽是一切諸趣有情名號卽是一切諸趣非情名號
卽是一切識心色相名號卽是一切法界名號卽是
一切諸法名號卽是一切諸教名號法中有人故號
阿吽鉢囉婆教主人中有法故名阿吽鉢囉婆教轉
阿吽鉢囉婆名號真言色身於一切處安立一切群
品於無上正等菩提

玄現章贅字實相品第三

阿吽鉢囉婆贅字卽實相本有言象故說阿吽鉢囉

婆教義趣則阿字門諸法本不生故顯示自形法爾
果談因一切種智源無性不備無相不現無用不至
地水火風空五大名理卽色卽是阿字本有義識大
名智卽心卽是阿字大空般若義色心不二卽是阿
字本不生不可得義故六大無尋周徧微密阿字性
四曼相好圓滿阿字相性相不二色心一如現種種
作業為三密用阿字用阿字體相用三大俱有本有
彌綸於法界常恒不變法爾常恒法體卽是如來本
地法身法爾之法必隨緣而現故為以此法身徧施
衆生如來以神力加持法爾聲字佛所加持聲字卽
實相故聲字卽諸佛加持身此加持身普作隨類之
身徧滿一切處故觀加持聲字卽見佛加持身見佛

加持身即見本地法身見本地法身時即是行者自身行者初發菩提心入阿字門見本不生際如實知自心是謂初發心時便成正覺若入阿字門即入一切字門一一字門具一切相備一切義一一字門皆悉諸佛不思議果故真言三昧門能滿一切願故薄伽梵唯以阿一字為真言一切字門攝持故一切字門從是生故阿吽鉢囉婆教總攝阿字一門若畧說阿吽鉢囉婆字門阿字門有一切諸法本不生義無福不備無智不顯吽字門有能滿願義無法不藏無機不度鉢囉婆字門有光明義無物不照無暗不除更說吽字門阿訶吁麼四字合成吽字故阿字門有一切諸法本不生不可得義徧攝一切真如法界法

性實際等理無所不盡即是法身如來訶字門有一切諸法因不可得義徧攝一切內外大小權實半滿顯密等諸教無所不盡即是報身如來吁字門有一切諸法損減不可得義徧攝一切行三乘五乘等行無所不盡即是應身如來麼字門有一切諸法吾我不可得義徧攝十力十無畏十變化等一切果法無所不盡即是化身如來又吽字本體者訶字因緣故為有義吁字損減故為空義麼字大空故為不生義又訶字因緣故非空非有為不生即中道義吁字損減故為空義麼字吾我增益故為有義如是三義與阿字無異又合說阿吽二字門阿是吐聲根本從本歸末一心舒遍彌綸法界無所不至吽是吸聲條末

從末歸本卷縮塵刹攝藏一念無所不盡一切理教
行果等皆悉無所不攝持此二音兩字門一切衆生
性德本具自證化他門法爾建立於阿吽二字更說
阿吽鉢囉婆字門阿是一切諸法體大不可得吽是
一切諸法相大不可得鉢囉婆是一切諸法用大不
可得阿是毘盧遮那頂輪王佛即一切諸如來吽是
本有薩埵文殊師利即一切諸菩薩鉢囉婆是法爾
頂法即一切諸法一切諸法一字門從阿字一音
顯五十聲韻乃至無量聲一字門從阿字義趣顯
法性六大乃至無量性相一字門從阿字形色顯
五種形色乃至顯形表等無量形色一字門皆悉
具三密一字門法曼即身密一字門音聲即語

密一一字門義趣卽意密一一字門理理悉攝持一
一字門事事盡攝持一一字門具無量實相一一字
門存無邊義趣一一字門字字融攝一一字門主伴
具足一一字門功德福利無量無邊卽是甘露妙藥
卽是妙醍醐味卽是無上法門窮劫說之不盡邊際
故謂陀羅尼門今開陀羅尼門攝化三界群品舉要
言之所謂彼薄伽梵以自性智光成威曜日輪徧照
無餘界摧壞諸暗暝令頓證菩提為阿吽鉢囉婆教
大旨

玄現章本品第四

阿吽鉢囉婆教總歸阿字一門阿字卽法爾所現根
本法輪故別立內外二門教體旣說之內相承門正

依取金剛頂經一字頂輪王瑜伽一切時處念誦成佛儀軌外相承門正依取大方廣佛華嚴經今專開內相承門故文一取時處軌然一字頂輪王佛一切佛頂輪王之輪王顯勝絕不共唯佛一體故從一切佛頂尊部經斷章取義以彼文補此文此文根本而彼文此文支芬故本尊餘尊主宰故

今將轉法輪故立門設關多不取文先依文取義依義立門開門為雙關釋關以文

阿吽鉢囉婆教法輪無盡故門分始終各立十門門合為二十各門開為雙關關合為二十雙十十無盡門十十無盡關主伴具足融通無礙而釋其關之文經說故文句長短不一妙義無量

玄現章始門建立品第五

阿吽鉢囉婆教所謂始十門者一正依門二傍依門
三教義門四教相門五教判門六宗旨門七本尊門
八折伏門九攝受門十發心門

所謂始十雙關者一頂輪王經華嚴妙經二一切密
經一切顯經三一念證覺五相成身四金剛寶輪如
來頂法五諸教根源諸佛本師六因果一際二世一
如七一法身佛佛中尊上八摧伏魔冤斷壞他法九
賜髻珠珍成自他法十起金剛信就灌頂師

玄現章終門建立品第六

阿吽鉢囉婆教所謂終十門者一安心門二開示門
三正行門四助行門五戒體門六積德門七得益門

八證入門九妙利門十應化門

所謂終十雙關者一攝護成佛密嚴灌頂二生佛一體三心無別三歡喜念誦不事諸天四修五種法行雙運道五修諸白法報四大恩六成熟四心捐捨三分七轉依轉正離苦得樂八有空不生光明三昧九密嚴淨土妙菩提場十隨類應同住大悲願

立門設關如是更取文為釋關門下科關關下揭文
文下加畧解終說法要流通

玄現章發心品第七

第一法輪正依門

第一關頂輪王經

第二關華嚴妙經

關頂輪王經 釋文云我依金剛頂瑜伽大教王為
修瑜伽者纂集此微妙成佛理趣門 解教主曰大
廣智阿闍黎從金剛頂經十萬頌中別譯本經開即
身成佛深祕法門金剛頂經一字頂輪王瑜伽一切
時處念誦成佛儀軌是是經一切教王之教王故薄
伽梵教取本經為內門正依彼定中炳現經題目金
剛頂一字金輪瑜伽一切時處念誦成佛大教王經
甚深極深祕經深納之密藏應待大器之出而唯授
一人故今文由藏經密部時處軌

關華嚴妙經 釋文云悔喜勸請向依普賢行願瑜
伽華嚴等 解教主曰薄伽梵令修輪王瑜伽者於
前後行方便門依華嚴等今因此義取華嚴經為外

門正依即是所以使為內門助行

第二法輪傍依門

第一關一切密經

第二關一切顯經

關一切密經 釋文云若如常念誦當依廣儀軌

文云如金剛頂經及諸祕密教一切衆大乘契經等

所說 解教主曰修瑜伽法有廣有畧今所依經祕

中祕密中密故非廣法故傍依一切密經有補輪王

瑜伽中前後加行方便

關一切顯經 釋文云出外轉大乘 解教主曰一

即一切一切即一故一切經典皆悉攝入輪王如來

智法海印三昧凡世間文字出世妙教內典外典皆

悉所以開演一阿字門故今亦不捨一切顯經取以
為傍依

第三法輪教義門

第一關一念證覺

第二關五相成身

關一念證覺 釋文云若修此瑜伽設現造無量極

重諸罪障必能超惡趣剋疾證菩提 文云修此三
昧者現證佛菩提 文云獲得無戲論輪王寶相定
乃至於一念淨心相應故獲無上正智 解教主曰
若有善男子善女人輪王如來三摩地力所加持受
攝護成佛密嚴灌頂於一念發起淨菩提心地時速
疾滅罪證大菩提

關五相成身 釋文云印心成鏡智速獲菩提心金剛堅固體印額應當知成平等性智速獲灌頂地福聚莊嚴身密語印口時成妙觀察智即能轉法輪得佛智慧身誦密言印頂成成所作智證佛變化身能伏難調者由此印密言加持自身成法界體性智毘盧遮那佛虛空法界身 解教主曰輪王如來所攝護入密嚴灌頂大曼荼羅道場受金輪灌頂時如來加持令汝五相成身故速疾具足五智三十七智乃至剎塵智信教諸衆信心勇猛積集功德正助行圓熟現身自在得轉依妙自見證入圓果

第四法輪教相門

第一關金剛寶輪

第二關如來頂法

關金剛寶輪 釋文云成佛事業輪其量同虛空

文云從月輪內涌出大法輪金剛之所成輻輳皆鋒
銳其色如檀金徧流大威光過聚塵數日依住月輪
面金剛表極堅圓顯福智滿利為無戲論斷壞諸妄
執光表一切智除破諸愚瞋以是現輪形 解教主

曰此智輪者輪王如來之三摩耶形故能現如來諸
相好能顯神變奇特妙用能爍斷一切有情諸罪障
妄執諸結使令頓證菩提

關如來頂法 釋文云無相無言法 文云一字頂

輪王殊勝祕密法 文云十方刹土中唯有一佛乘
如來之頂法等持諸佛體 解教主曰本乘者一切

一乘中最勝一乘一切圓乘中最勝圓乘一切密乘
中最勝密乘一切佛教中無上頂法故今稱此密乘
曰教皇法帝是為實教中無上醍醐法味是為密乘
中無上甘露妙藥如來為度末世戒緩乘急機故說
末法中心咒佛恩廣大無量信教諸衆淨信勇猛應
當乘此神變奇特圓滿無礙寶乘轉不退法輪到密
嚴大都證成佛頂大法輪王身

第五法輪教判門

第一關諸教根源

第二關諸佛本師

關諸教根源 釋文云阿字菩提心種智之本源是
一切字母十方三世佛所說一切法無非此字體

文云此性成密言三世佛法教皆廣明此字其義說
難窮 亦云輪王最上咒佛深理趣門一切諸咒法
無量佛所說皆從此中現 亦云如是輪王法過去
佛建立為衆生說 亦云過去未來現在佛說我今
亦說恒河沙數同名如來說皆隨喜一切佛所說無
礙教令 亦云我今說之令惡時衆生得安樂故

亦云真言教法成就中真言諸鑛地中財所有諸地
之方所諸餘所有占算論王法理論及書畫醫方工
巧如是等一切皆是世尊說 亦云於此教王中攝
入一切法諸佛法眼中說為最殊勝 亦云見諸有
情多逼惱釋師子尊而演說愛樂此法修行人成佛
當受人天供由修一法成大覺成真言王衆所讚彼

人不久佛菩提廣度無量諸群品 亦云我是於一切過現未來一切諸佛最上祕密心咒 亦云我今說此咒具足諸功德當來惡世時我法將欲滅能於此時中護持我末法能除世間惡毒害諸鬼神及諸天魔人一切諸咒法若聞此咒名皆悉自摧伏我滅度之後分布舍利已當隱諸相好變身為此咒佛有二種身真身及化身若能供養者福德無有異此咒亦如是一切諸天人能生希有心受持及供養所得諸功德如我身無異 解教主曰諸佛所說教法皆無非阿字體輪王心咒者雖如離阿字外聲然不離其內聲一切言語文字皆從阿字為首故於阿字門中總不立顯密二經一切法教皆悉從此中現故別

阿字門密中密故密經根源密經源故亦顯經源密
經諸佛隨自意說顯經即隨他意說故密教為根顯
教為枝然實一切佛所說皆悉不出阿字門故顯密
不二根枝本末主伴具足圓通無礙况輪王心咒勝
絕不共神力無量一切法中法要一切如來窮劫說
其功德不能盡其邊際諸佛為度末世濁惡衆生故
說此根本咒王此根本一字輪王於一切教法中無
礙教令諸佛主宰所謂諸佛深理趣門無量佛所說
皆從此中現宜哉薄伽梵令末世有情知輪王如來
頂法者一切諸教之根源

關諸佛本師 釋文云三世諸如來皆因入此法速
獲一切智 文云諸佛皆承旨菩薩咸敬奉天龍人

非人攝伏而歸命 亦云世尊告金剛手菩薩言善
男子我過去世阿僧祇劫當彼之時有佛名轉輪聖
王如來應供正徧知以三摩地住轉輪王形善男子
我於彼時曾為長者於彼如來所承事供養諸佛設
食金剛手時彼如來說此一字輪王真言我於彼時
捨家趣於非家以大精進求成就不捨此身得成持
明轉輪聖王得神通遊於阿迦尼吒天善男子我成
熟無量百千俱胝有情安立於無上正等菩提調伏
無量百千難調有情次第皆得成等正覺善男子當
知此不思議輪王佛頂大威德大精進勇健百劫不
能具說我今少分說於後五濁世應廣顯揚宣布於
淨信堅固有情大乘者其人則持一切如來祕密

亦云觀自在菩薩白佛言世尊我曾憶念越恒河沙
數劫當彼時有佛名寶髻如來應供正徧知世界名
妙慧我當彼之時貧匱以賣柴方便活命我聞彼寶
髻如來應供正徧知所成就無量功德於如來前發
願如來皆令成就我於彼時在家作是思惟我今請
寶髻如來設飯食早起賣柴營辦食飲往詣世尊請
佛飯食如來受請我於佛世尊發廣大淨信奉獻食
禮佛已作是願言一切衆生勿令貧匱彼如來知我
信心猛利清淨謂我言善男子持此一字佛頂輪王
廣為我說本教福利則彼世尊為我說我歡喜奉行
我以大精進勤勇以此身得大明王得無礙巖三摩
地世尊由此三摩地成熟無量百千持明於無上正

等菩提 亦云乃往古曼殊室利菩薩觀世音菩薩
得大勢至菩薩虛空手菩薩及我釋迦牟尼世尊皆
於因地為凡夫時怖於生死慕善知識求得此法依
教修習脫諸煩惱令得如是大自在處 亦云過去
無量無數同名異名一切如來皆凡夫時同得證是
一字頂輪王咒無上菩提三摩地法成等正覺我亦
證成是一字頂輪王咒無上菩提三摩地法成等正
覺 亦云古昔多人得成就由修頂王大奇特我曾
修此佛頂王 解教主曰先佛言一字輪王大法於
後五濁世應廣顯揚宣布於淨信堅固大衆者如來
為惡世有情少精進少明慧不能受持廣法者說此
極深密乘如來當於未來世有情劣精進我慢瞋恚

癡無慙矯慳悖不能依儀軌修習瑜伽行為如是愚夫說除諸魔法末世凡夫求佛果法無若所攝受於輪王如來三摩地力先佛成佛法已然況是法於為末世有情說成佛教故薄伽梵教末世衆生知輪王如來者一切如來之本師信教諸衆應當淨信堅固如古先佛奉事輪王如來上求菩提下化衆生成就菩薩願行乃至等正覺證得三界法王位

第六法輪宗旨門

第一關因果一際

第二關二世一如

關因果一際 釋文云吽 文云由作此加持於一切時處魔冤不能侵 文云如來初成佛於菩提樹

下以此印密言摧壞天魔軍 解教主曰阿訶汗麼

字合成吽字阿字果而訶字因因中有果果中有因

因即果果即因故一切如來菩提心阿字為因

行大悲萬行汗字證究竟大菩提涅槃之果阿字因

圓果滿攝因果於一念無有前際後際又所謂吽字

門一切諸法無因無果本來清淨圓寂義故纔發菩

提心降伏四魔即坐妙菩提場成大覺位亦是因果

一際因果融攝因果不二義入吽字門三昧損滅惡

法行菩薩行證成大菩提心如來果以佛加持故即

離惡因即得善果是為阿教宗義

關二世一如 釋文云滿所希求願世間出世間一

切皆賜與乃至於現生成就本尊身 解教主曰世

間者卽俗諦出世間者卽真諦住真俗不二妙諦乘輪王如來深祕密寶乘超入淨菩提心門現生成佛是為阿教本旨

第七法輪本尊門

第一關一法身佛

第二關佛中尊上

關一法身佛 釋文云金輪王徧照如來形服如素月以一切相好用莊嚴法身 文云如來頂輪王以佛無上寶為眷屬圍遶 文云若有本尊像室內面西安瑜伽者面東每初入道場想佛常住世以五輪着地如教歸命禮 文云顯勝絕不共唯佛一體故 文云虛空諸如來盡入於輪內 文云一切如來

同一聚密合成此一法身更無有二相 解教主曰
唯佛一體故一法身佛一法身佛故攝一切佛身無
有二相故理智不二理智不二故一法身佛是謂一
真法界摩訶毘盧遮那一字頂輪王佛出法樂都住
加持門攝化一切法界群品神力廣大萬德圓滿法
身如來

關佛中尊上 釋文云為一切佛頂輪王之輪王
文云輪王威德最勝無極尊 文云備七珍圍遶
文云如世金輪王具七寶眷屬如來頂輪王以佛無
上寶為眷屬圍繞 文云十方三世佛所說之密印
盡在此印中 文云不待諸印助一成一切印 亦
云一字輪王一切如來祕密一切如來堅實一切如

來最勝 亦云轉輪王佛頂一切真言中為最勝一
切真言王中為上上 亦云由纔見此像修一切真
言於一切教成就堪任由纔見此解脫一切罪一切
世間出世間真言皆得流通由纔見此持金剛攝受
由纔見此遠離一切障毗那夜迦由纔見此十八大
教王安樂易得成就由纔見此一切天龍藥叉乾闥
婆迦樓羅緊那羅摩睺羅伽人非人等成禮敬乃至
畧說由纔見此一切世間出世間一切明教中所說
句義皆得成就是一切世間出世間真言明上上此
佛頂一切佛頂中為主宰 亦云於諸咒中一字為
尊上 解教主曰一切諸餘尊法者皆悉不依輪王
如來祕密神變加持威力難得成就最勝悉地唯是

輪王如來頂法勝絕不共故不待餘尊助由纔見輪王如來尊像即得無量功德福利況世間出世間一切所願以淨信意作此法者皆悉無不成就所謂一字輪王一切如來最勝互裁一切佛中尊上

第八法輪折伏門

第一關推伏魔冤

第二關斷壞他法

關推伏魔冤 釋文云推壞諸暗暝 文云爍斷彼罪障安執諸結使 文云推伏一切魔令現證悉地 文云魔障不得便 亦云善除諸妖邪退諸惡星宿毒害母神等及毘那夜迦惡願諸鬼神逼惱有情者 亦云若國王帶不被他敵之所侵擾 亦云淨

信修習輪王佛頂者所住處所去處一切處若誦闢
戰論理諍訟悉皆得勝 亦云或有大國王淨信佛

法者書此真言

有深秘法

繫旗纛上或於頸下則往他敵

若見則便破敗他軍消融互不相救何以故以如來
神力加持故 解教主曰入輪王如來最勝瑜伽三
昧者如來神變攝護力故能推自他結使能破一切

魔冤能退一切怨敵能滅一切敵軍復能隨意難調
鬼魅諸天等令壞令打令馳走令挫辱皆是輪王如
來威神加持力故所求如意滿

關斷壞他法

釋文云纔現奇特身諸聖衆皆歿

文云以輪王威德斷壞諸法故

亦云能令他法速

即毀壞

亦云菩薩以佛威力悶絕躡地利那謨呼

律間一切大威德天一切器仗墮落於地精氣威力
神通皆奪由轉輪大真言明王加持故 亦云一切
咒師行其本法聞此咒已皆悉摧壞一切諸天所有
神通皆悉退失其持咒者不滅他法欲滅他法由持
咒者所存念處一切世間及出世間諸持咒者及諸
惡星無不摧伏 解教主曰入輪王如來深祕密頂
法門淨信堅固轉不退輪則輪王如來所加持故餘
一切世間出世間真言明令斷令壞令打令伏令縛
獲得種種神通阿毘遮魯迦法等佛事業屬斯門如
來化一闍提徒入折伏三摩地大悲故

第九法輪攝受門

第一關賜髻珠珍

第二關成自他法

關賜髻珠珍 釋文云賜髻珠七珍令頓證菩提

亦云現世獲得勝安樂他世必獲於解脫 亦云不被一切天世間沮壞獲得不退轉一切皆獲安樂一切處一切苦惱悉皆除滅一切皆悉起大慈行同一味相不被火燒不被水溺不被刀傷不被毒中不被蛇齧不被一切難 亦云由照觸頂王光故除一切苦受彼時有情離瞋恚互觀如父母想 亦云以世尊神通行作神通癡狂者得念盲者得視瘖者能言跛者能行聾者得聞裸者得衣所思求者皆得食飲衣服及資緣具受苦者得安穩乃至懷胎者產生之時皆得安穩 亦云於頭上帶持彼人吉祥清淨威

德吉慶威光威力不被他陵突獲得吉祥辯才 亦云菩薩持此者獲得無量勇健力獲得如來加持一切魔無能沮壞一切諸天不敢逼近 解教主曰輪王如來本願力賜髻珠七珍之寶掩惡揚善證菩提故攝受頓漸二機化度無有所洩闕凡聖一如門上卽身成佛堂悲願廣大無邊若有人善能起信懺悔自他諸罪與諸一切衆生為成佛菩提故止惡修善乘輪王如來密乘願滿所願者輪王如來決定攝受一切願者令滿世間及出世間一切諸願七寶圍遶解脫三世

關成自他法 釋文云能成一切印 文云脫彼諸地獄一切極炎熱 亦云能令自法速得成就 亦

云所護自身所護他人所呼鬼神所遣鬼神所求事
業並用此咒 亦云成就佛咒法及觀世音咒法梵
天咒法及世出世須作此法 亦云若誦一遍護得
己身若誦二遍朋友財物皆蒙擁護 亦云汝等從
今已後彼修真言行者於真言行儀軌所說食蜜油
麻葱蒜薤蘿蔔等真言行中所遮修輪王佛頂真言
成就者若食汝等不應執過不應惱害不應奪悉地
不應令心散動以我教令故修佛頂真言者不應起
惡心汝等見彼修行者應起慈心若違我語勿令汝
等移動本處於彼起異心者不得住於阿吒迦縛底
王宮金剛手祕密主宮違越我教令我當擯罰 亦
云持頂輪者墮惡趣無有是處 亦云常得宿命智

不墮惡趣超千劫生死流轉證無上正等覺一切天
龍常當擁護 亦云一切諸天禮敬彼人 亦云持
誦輪王佛頂者彼獲得不思議神通相應於一切有
情中為最勝不應疑惑獲佛神通所求欲願獲得無
疑 亦云於地獄中亦作神通為處地獄有情作利
益故如是一切有情息除飢苦 解教主曰輪王頂
法究竟大乘甚深密藏能成就自法復能令攝令成
一切他法是法能救惡趣有情扇底迦法擯迦羅法
補瑟微迦法等佛事業屬斯門如來導淨信者入攝
受三摩地大慈故

第十法輪發心門

第一關起金剛信

第二關就灌頂師

關起金剛信 釋文云傳法阿闍梨先簡擇弟子淨
信決定者 文云不生疑惑心 文云灌頂師若見
如此勝法器以種種方便慰誘先為說大乘祕密門
教發菩提心 亦云汝等於真言行當勤修於大乘
不應生疑惑佛教中不應疑惑 亦云其受法人諸

根端好性復純正發菩提心 亦云由信獲應驗
解教主曰灌頂師見勝法器應教發菩提心起金剛
信願求入祕密門者必先當起不壞信發成佛心由
菩提淨心起金剛信心由金剛信心成菩提淨心應
知發心起信皆是輪王如來不思議神力所攝護三
摩地力所加持

關就灌頂師 釋文云求學瑜伽教 文云親從阿
闍梨對受諸儀軌 文云從今至成佛莫捨菩提心
敬仰阿闍梨如諸佛世尊所有言教誨應當盡奉行
不尋求師短見隨煩惱行觀貪染本淨於諸同學處
不生嫌恨心敬如執金剛 文云於此教法中一字
不應向未灌頂者說本尊諸教法除本受法師設諸
同行亦不得為說縱已得成就纔說便散失現招
諸殃禍中夭墮地獄是故常守護此三摩耶禁諸佛
其宣說衆聖皆保持應學勿違越 解教主曰若有
人欲入輪王祕密門現證佛菩提應當懺悔諸罪護
持如來所示三摩耶親從灌頂師受教化

玄現章安心品第八

第一法輪安心門

第一關攝護成佛

第二關密巖灌頂

關攝護成佛 釋文云皆蒙受加持 文云令頓證菩提 文云令現證悉地 亦云此甚深法要餘世界中甚難得聞此由如來加持於餘多世界中得聞若有人一經於耳根應知皆是轉輪王三摩地之所加持應如是知若有人得此如來法要修行者得至於手中皆是如來加持 亦云是咒王經於無量佛刹難得見聞若得聞者皆是如來神力加被若得此經則是如來種族親屬何以故此如來咒三摩地王實難思議於諸咒中最上最勝為大第一是等有

情應當決定生最上心成此頂輪王 亦云若得此
教王彼人同如來亦同於菩薩天蘇囉禮敬心得不
退轉 亦云若得此教王證成兩足尊 解教主曰
令者攝護義擁護義加持義證菩提證悉地者成佛
義不為如來所攝護難得證菩提亦復難得見聞此
法要然所以見聞此法要獲得此教王者應知輪王
如來三摩地之所加持若人未發菩提心者不與佛
攝護已發菩提心者所以如來被擁護金輪王徧照
如來為度末世濁惡有情故垂無緣大悲不擇善惡
二業不洩頓漸二機攝入凡聖一如門機感相應隨
願即得是故若有人如來所加持發菩提心者皆悉
入於灌頂壇令成佛故安心決定立可獲得

關密嚴灌頂 釋文云由此印密言即蒙虛空界一

切佛世尊以金剛寶冠輪鬘繒絲等與具足灌頂

亦云弟子等於阿闍黎殊勝捨施供養捨己身應受
轉輪王佛頂印契及真言阿闍黎於彼無悋心悲愍
心應教授即從此已後於一切真言成就必能堪任
得不退轉入一切菩薩位成入一切世間出世間曼

荼羅三昧耶一切天龍藥叉乾闥婆阿修羅迦樓羅
緊那羅摩睺羅伽等及一切有情不能惱害持頂輪

者

是初灌頂法有深祕今畧
不說經文亦不詳說

亦云曼殊室利菩薩白

佛言世尊云何為阿闍黎云何灌頂時世尊讚歎善
哉善哉妙聲善哉妙音若有欲受灌頂者於阿闍黎
比前兩倍應施應施雙纜應施金銀熟銅器滿盛諸

種子及藥香水則阿闍黎對大曼荼羅前文如國王

受灌頂畧文如是灌頂者即為阿闍黎是阿闍黎灌頂法有深祕今畧

不說經文亦不詳說亦云不淨信者矯誑者於師長不恭敬

者不應令入灌頂令淨信者求囉惹愛敬者求上上

成就者其人所有殊勝寶物施於聖衆及師由七番

灌頂彼人福勝七輪王有深祕法今畧不說經文亦不詳說亦云觀

自在菩薩白佛言世尊於此得灌頂於一切曼荼羅

得灌頂於此得印可於一切曼荼羅得印可於此得

灌頂超越一切魔道解脫一切魔道於一切真言自

在由入此持金剛攝受得離一切罪由入此能堪任

一切事業由入此安樂易方便能成大明王離一切

障難由入此或善男子或善女人成就無量功德世

尊我曾為人修此一字明轉輪王令得無量菩薩三
摩地令得不思議如來加持 解教主曰先佛菩薩
亦曾為人修輪王法令得加持成佛今云何為修密
巖灌頂能化灌頂教主密修輪王祕密灌頂法由輪
王如來加持力攝護所化心王淨除無始罪業令頓
證大菩提由佛加持莊嚴佛身嚴飾佛土是故此密
嚴加持成佛灌頂法非彼外道聲聞緣覺所行之境
灌頂教主無相具一切相無言具一切言入佛頂不
思議力三摩地設住十地菩薩皆欲消融驚駭不能
瞻睹何況餘釋梵護世天等教主住如是神通修密
巖灌頂化心則色亦隨受化心王受化則心數亦復
如是色心不二故王數不二故今能化教主密修輪

王灌頂化度所化心王令轉識得智理智不二故身
土不二故心王受化度則得佛身佛土輪王如來最
極祕密授職灌頂者證得三界法王位之法亦是為
能化教主之道卽是甚深極深祕密唯授一人頂法
故說之則越三摩耶故今畧不說特輪王如來親授
大法故不同餘宗灌頂式

第二法輪開示門

第一關生佛一體

第二關三心無別

關生佛一體 釋文云種種開示已 文云此微妙
成佛理趣門自心成等覺 文云等同一切佛 文
云無邊諸會識淪溺於六趣由自心虛妄感種種業

報懷佛性不知深可悲傷愍我今云何救 文云瑜
伽理趣門自心所建立自身為本尊集諸如來體加
持為己身 文云同一體清淨 解教主曰衆生與
佛本來一體然衆生由自心虛妄感種種業報不知
懷佛性今由密嚴灌頂如來神變攝護力故能化化
所化能所融攝頓離能所心王閑生佛不二慧入我
我入己身成佛身

關三心無別 釋文云住此無緣悲常拔濟利樂共
彼同迴向願成大菩提應一切智智 解教主曰住
此無緣悲者自心住佛心義常拔濟利樂者自心行
佛心義共彼同迴向者迴向自心於衆生心義願成
大菩提應一切智智者自心與衆生心成無上菩提

而應佛心義自心佛心衆生心本來無差別信教諸衆閑三心無別關則度三惡四惡趣諸苦衆生化人天三界一切群迷亦是不為難亦如彼外相承門教義攝入此一句法義無量

第三法輪正行門

第一關歡喜念誦

第二關不事諸天

關歡喜念誦 釋文云於一切時處念誦皆成就若於閒靜處名山隨意樂迴峯最殊勝或諸教所說諸佛稱讚處若舊塔殿宇或創建精室 文云於一切時處念誦獲成就 文云瑜伽教王中如來所稱讚無有時方處當知不令間四時或三時二時乃至一

無間一切時 文云或無壇淨室隨處作念誦 文
云百八七三 文云萬千或百八一數為常定不應
有增減 文云為修瑜伽者不好樂多法或衆世務
迫用廣法恐闕七三隨所宜 文云若更極駘迫恐
間闕時分誦本尊密言七徧或三徧卽任行住坐隨
意作念誦 文云卽取菩提珠 文云若執珠記數
一百八未滿中間不應語 文云敬珠猶如佛不應
輕棄觸 文云由珠積功德速獲成就故 亦云菩
提子念珠決定得成就上中下悉地通諸真言用金
銀等作珠增益應用之清淨頗胝迦一切義成就
亦云寂默而念誦悉地卽成佛若不如是默真言不
成就 亦云持頂輪者所有一切有情互得安樂得

念佛三摩地 亦云耽着咒文字常樂空解說不勤
修持誦義無證成就 解教主曰輪王如來攝護力
故發菩提心起淨信心就灌頂教主入攝護成佛灌
頂壇令得安心令成佛心如來神力加持故自他共
安住一切如來祕密藏令一切衆生作歡喜是故受
金輪灌頂一切衆生深知佛恩廣大歡喜念誦者不
動言文卽是平等法身不轉色聲卽是全身舍利念
之則速滅無始罪障誦之則頓開如來知見起金剛
不壞淨信心念誦此輪王如來最勝真實陀羅尼者
世間出世間一切所願皆悉無不成就受持此輪王
如來入歡喜念誦三昧者得念佛三昧故不擇時方
處亦不必限念誦數勤勇精進住默念者必速獲悉

地今於四念誦法中專取金剛念誦法故不應依於
聲由珠積功德速獲成就故信教諸衆宜掐加持珠
菩提子金銀水精隨意樂今於現證菩提法修歡喜
念誦為正行少從七三多百八乃至千萬若耽着咒
文字常樂空解說不勤修不念誦徒壞滅此經教法
不成壞已身若有人未就教主受密嚴加持成佛灌
頂者不當念誦輪王如來密言若犯此三摩耶現世
招諸殃禍他世必墮地獄聖教如是決定勿生疑若
復有人欲依聲念誦者及未受灌頂發菩提心欲修
念誦者應當念誦唵吽吽吽吽吽吽吽吽吽吽吽
吽吽如是聲字實相卽法身如來故卽是大我名號
故人天法主故於十方三界微塵刹土一切群品中

教主故無上大師故應供正徧知故常當歸命禮此
毘盧遮那頂輪王佛身亦不真言色身即是法爾
言象法身如來故誦持之則能推一切魔障能滅一
切罪惡能除一切諸難能滿一切福智能現證大菩
提猶如輪王如來一字神咒是故常當歸命誦持供
養

關不事諸天 釋文云諸天神仙等皆不應禮事勿
不敬陵蔑 亦云不信不事諸天天神邪神鬼等常
不懈怠攝心精進惟樂修學大衆道教意欲圓滿菩
薩大願超衆魔境趣菩薩地如是之人合得是經成
就此咒 亦云此等諸天雖復日日請召恭敬如法
供養於此法中不應禮拜何以故以頂王尊大一切

力不思議持此咒者雖不禮拜一切諸天勿語毀滅
諸咒天神何以故為諸天神部族相攝護持法故
亦云敬祭一切天不歸向頂禮 亦云行者於世天
供養不應禮 亦云一切諸天應供養不應致禮我
先說是故不應作毀謗亦不應起於譏嫌 解教主
曰若有淨信善男善女欲入一字佛頂大法輪王執
持諸佛形相神變大三摩地門應當隨順聖教若不
然頂輪瑜伽初門行者雜修諸天瑜伽法則信散亂
故念散亂故行散亂故不可成就輪王悉地不能示
現大法輪王奇特色身姿貌威德是故不應禮拜奉
事一切諸天神仙等

第四法輪助行門

第一關修五種法

第二關行双運道

關修五種法 釋文云隨力辦供具塗香闕伽水焚
香飲食燈幡蓋鈴珮等陳設壇四邊 文云奉嬉常
受悅獻笑佛憐念奉歌得法音供舞得神通奉瓶得
賢瓶能滿諸意願進寶獲衆寶由貢莊嚴樹得佛衣
覺樹奉幢得兩寶能徧濟貧乏供幡超勝魔獻鈴衆
歸從奉瓔獲嚴具進鬘得寶冠上花得佛容 亦云
若讀誦若受持若供養乃至書寫經卷為他演說
亦云若修此明王若讀誦若供養若書寫經卷乃至
受持彼不墮惡趣令彼得正念 亦云若有成就此
明王者讚誦者必不墮惡趣得宿命智不諂曲無離

間語不矯不異心具善巧方便 亦云若有善男子
善女人若受持若讀若廣說若供養若常念誦其人
不久速證無上正等菩提 解教主曰總於一切大
乘經受持讀誦供養書寫解說為修五種法別信力
故受密嚴灌頂念力故持輪王密言歡喜力故讀誦
輪王乘勤修力故供養輪王如來積德力故書寫輪
王經以助正行希求速疾悉地成辦即是助行方便
門方便即真實義華嚴禮法華嚴念佛法亦是攝入
本關

關行双運道 釋文云定慧應雙運且如觀婀字纔
觀即了知諸法本不生知本不生故是名奢摩他諦
觀於字體是毗婆舍那此名雙運諸觀皆如是 解

教主曰定慧雙運者本經要門修瑜伽深祕今為令
末世劣機易行故以念誦三昧為正行若欲為深行
阿闍黎最勝悉地成滿瑜伽者應當就教主受重重
灌頂學瑜伽勤修密法勇猛精進修助行今畧說缺
詳如彼佛華法華觀法亦攝在本關中兩部五部三
部等一切瑜伽觀法亦復攝入本關

第五法輪戒體門

第一關修諸白法

第二關報四大恩

關修諸白法 釋文云授與佛性戒 解教主曰時
是末機是濁所謂戒緩乘急時機故今依佛性戒印
言加持神力令滅一切罪具足一切善令處世間修

白法為戒體白法者非黑法猶謂善法澄淨誠實為性知恥義非必云四白法之謂當行然不行不當行然行皆是犯白法一切有情機根有上下皆有淨菩提心照一切諸行於此白淨無垢心而養斷德智德恩德則應不為戲行戲論之人若有人白法優內善行溢外勇猛精進希求受戒者應依式授三戒五戒八戒乃至十戒等今外不為戒目所縛內從容修白法乘輪王如來寶乘至密嚴大都為本關主旨

關報四大恩 釋文云孝忠義德備深敬重三寶

解教主曰父母恩君主恩衆生恩三寶恩謂之四恩佛寶法寶菩薩寶謂之三寶四恩素大互報之推此四恩及一切世間門淨信勇猛乘輪王如來密乘則

雖言未受五戒十戒式佛神力加持故不持戒者名
持戒謀王室安輝國威富國民齊家政全人道之法
皆悉攝在本關

第六法輪積德門

第一關成熟四心

第二關捐捨三分

關成熟四心 釋文云樂四心無量 解教主曰樂
大慈心無量普徧於一切樂大悲心無量普徧於一
切樂清淨喜心無量普徧於一切樂大捨心無量普
徧於一切四無量心成熟則三解脫等一切勝願亦
應成就

關捐捨三分

釋文云捐捨身命財無厭悔顧慙

文云捨身奉獻 解教主曰為護正法為得佛果捨
三分者所以行菩薩行積集出世功德嚴飾密嚴淨
土六度萬行亦攝在斯關中若一念為名聞則捨財
捨身捨命更無功德豈啻無功德應當墮落餓鬼諸
惡趣况於不捨三分者
第七法輪得益門

第一關轉依轉正

第二關離苦得樂

關轉依轉正 釋文云能徧入佛智成佛猶不難獲
智壽力年得一切徧行 文云獲無限福利 亦云
福德智慧清淨圓滿 亦云輪王最上咒若有證成
者此界及他土一切無等過容貌及威力而證於最

上 亦云其持咒人身即端正猶如天童似年十六
壽命一大劫百寶藏門悉皆自現 亦云身如初出
日輪真金瓔珞臂釧作閻浮檀金色一切嚴具莊嚴
其身著天妙衣具諸相好縱廣周停身相奇特百千
光明莊嚴圓光一尋超過日輪映奪一切色身 解
教主曰轉依身謂轉依心所依為身故身常似少年
轉依報入佛智謂轉正允識轉成佛智故轉正報六
大無身心身一如故獲智壽力年轉正報百寶藏門
悉皆自現轉依報國土安穩豐衣食住轉世間依報
安住密嚴淨土轉出世間依報世間出世間本來不
二十界依正自心所現作故若人欲離違情境赴順
意境應當一心淨信供養輪王如來如來神力加持

故令滿福智二嚴令脫惡趣住於善趣意樂轉依依
者依付正義報者從因生果報

關離苦得樂 釋文云推滅諸罪障獲諸悅意樂

亦云遠離一切苦得一切安樂 解教主曰受密嚴

灌頂行歡喜念誦者輪王如來所加持故無量罪障
悉消滅離一切苦怖獲得婆伽梵金剛薩埵樂十方

諸如來護念加威光威力受持者一切菩薩一切諸
天天龍八部等行住坐卧每隨身常擁護一切人天
供養恭敬故晝夜卧安覺安一切時處獲得無礙巖
三昧

第八法輪證入門

第一關有空不生

第二關光明三昧

關有空不生 釋文云阿 文云一切如虛空虛空亦無相諸法相應故舒徧於一切 文云所覩彼彼境皆照空不空 文云阿字諸法本不生 解教主曰阿字有有空不生三義一切如虛空虛空亦無相者阿字空遮情義諸法者阿字有表德義相應故舒徧一切者阿字諸法無身軀涉入義即是不生義即是遮表不二義空者阿字諸法空遮情義不空者阿字諸法有表德義照空不空者空有不二遮表一如即阿字諸法本不生義阿字有者有空不二之有理智不二之理色心不二之色遮表不二之表阿字空者空有不二之空理智不二之智色心不二之心遮

表不二之遮阿字本不生者有空不二理智不二色
心不二遮表不二之實際又阿字有者一切諸法本
不生故一切諸法本有本有即本不生本有常恒故
法性本體常有常現隨緣而生然實似生而有故非
因緣初生假有凡眼不知本不生際故見有生滅去
來然實不生不滅不去不來雖言因緣之法故名為
有實非假有即是本有又阿字空者一切諸法本不
生故一切諸法大空大空即本不生大空三昧故一
塵一法若有取捨者皆非正見離取捨妄見故且言
無性無取捨則諸法宛然畢竟常寂無相而具一切
相故非無相空寂凡眼不知本不生際見有生滅去
來然實不生不滅不去不來雖言無有性故為空實

非頑空卽是大空又阿字本不生者本者本初之義
不生者不始生之義有空不生三義二而不二圓融
攝入玄義無盡今唯畧說信教諸衆以信得入阿字
玄妙門觀色心本有諸法宛然自證常恒不變之佛
身

關光明三昧 釋文云以自性智光成威曜日輪

文云根塵識諸法自性本皆空 文云離能取所取
自性光明成菩提體堅固 文云諸法本不生 文
云空淨不可得 解教主曰以自性智光成威曜日
輪者阿字本不生不可得故生一切法義本有故有
何造作本有故離因緣平等法界無能所果地境界
卽是輪王如來徧一切世界平等智身所證能取者

根識所取者塵卽是阿字緣生有然實不生而生故
本有離能取所取者都亡取捨見故卽是阿字無性
空遮情實義自性者理體大光明者智相大菩提體
堅固者理智冥合色心不二用大是故自性光明成
菩提體堅固者離能所還存能所阿字本有三昧表
德妙趣卽是本有薩埵行者平等智身境界入我我
入卽成就本尊輪王如來身為破緣生有執知遮情
實義故言根塵識諸法自性本皆空言離能取所取
為破無性空執知表德妙趣故言自性光明成菩提
體堅固為破有空病故言諸法本不生為知本不生
實義故言空淨不可得又自性者六大法性故有空
不二理智一如之本際卽是阿字本不生體大光明

成者識大故智理智攝入理故卽是阿字空有不二
之空用大菩提體堅固者五大故理智理攝持智故
卽是阿字有空不二之有相大一切諸法當相塵塵
悉是本有常住法性性成就阿字種智根源凡聖十
界一切群品皆是全六大體性現四曼相好各具三
密妙用不變法爾而隨緣不變隨緣而法爾有空不
生三義互融攝不可得體相用三大互具足不可得
卽是阿字玄妙門信教諸衆修吽字因業大悲萬行
證阿字果智大菩提心入自性一切智智鉢囉婆三
昧得鉢囉婆三昧卽現證自性平等智身現證自性
平等智身卽是現證自身如來現證自身如來則應
當發願唯願本尊十方諸佛加持於我今此現證菩

提堅固如言自性光明由如徧修功用隨作隨獲亦如素衣染色隨染隨成信教諸衆應當勤修正助二行轉二利願輪勇猛精進住不退轉地光明照十方證成一字佛頂大法輪王身得內證外用圓滿自在是為證入真實門
第九法輪妙刹門

第一關密巖淨土

第二關妙菩提場

關密巖淨土 釋文云受苦諸群品解脫生淨土
文云十方無邊界微塵刹土 文云淨三界空虛即於虛空中觀婀字成寶殿是佛不空體 解教主曰摩訶毘盧遮那頂輪王佛現徧一切世界身無能觀

頂妙相住於阿迦尼吒天王宮中如來所加持無量
福出生普徧光明大摩尼殿即是本尊輪王如來密
巖淨土其土超越三界無中邊普徧十方無邊際如
來放大光明照耀十方微塵無量世界無量世界佛
加持故相映不壞而此世界非彼外道聲聞緣覺所
行之境獨受金輪甚祕灌頂入歡喜念誦三昧者如
來攝護力故速得解脫不墮惡趣速得安住密巖淨
土

關妙菩提場

釋文云盡以虛空界為宮殿安住

亦云為大持明轉輪王隨意住世與百千眷屬騰空
徃無量世界見彼佛聞法皆得勝解知一切遊戲神
通與大菩薩住乃至徃極樂世界見無量壽如來及

見曼殊室利菩薩及餘菩薩共俱以大人相莊嚴頭
為頂髻以種種真言教作衆生利益我畧說乃至次
第生菩提場證無上正等菩提 亦云從此捨終乃
至坐菩提場不墮惡趣不生下族 亦云若有持此
大明王我等所有一切天見彼皆起分半座 亦云
或有餘見成就頂輪者從座不起者彼頭破百分

亦云持頂輪者隨惡趣無有是處常生婆羅門利利
大王族父母不離端正具色相好成就文筆書論工
巧不慳恪得聞持不忘法爾佛頂威德不思議無比
量 亦云由聞此陀羅尼故轉所生處皆得清淨
亦云得到菩提道場最勝之處皆由讚美佛頂尊上
陀羅尼 亦云成就頂輪真言者獲得無量功德福

利一切世間書論工巧皆能知乃至坐菩提場 解
教主曰受密嚴灌頂一切信教諸衆受持供養增進
功德入歡喜念誦三昧安心決定者以佛加持力五
相成身故如來攝護故隨願往生五佛妙刹或遊戲
微塵世界諸佛佛土乃至坐於無上菩提道場

第十法輪應化門

第一關隨類應同

第二關住大悲願

關隨類應同 釋文云從自成佛身徧體毛孔中等
流出一切世界微塵數如來身舒徧盡諸有情界
亦云佛頂不思議自身是如來三摩地形相示現於
衆生變化於三有一切佛形相以定現輪王說大真

言王能作衆生利猶如如意寶 亦云世尊以幾所
名號佛頂真言三摩地行差別於世界轉 亦云有
五阿僧祇百千數名一切聲聞愚癡衆生雖稱我名
亦不識我如是異名我為如是成熟一切有情亦於
諸經說是異名 亦云復有一類有情知我無邊殞
伽沙等世界中無量種異名如來說法如如衆生調
伏成熟如來亦不去來分別出現色相以不去來無
作分別則能出現無量法事陀羅尼門 亦云如來
隨調伏成熟有情說法如來無所分別無功德用無
量種真言色身事相而轉 亦云若人修此者彼成
就最勝得為忉利王彼人終不死無量俱胝衆圍繞
往餘利變身如佛形化諸有情類變身金剛手利樂

諸有情化作天帝釋或現梵王身調伏諸有情或現
童男童女身或入地獄鬼畜生趣隨現諸身救脫諸
衆生 解教主曰上求菩提下化衆生菩薩本願信
教諸衆成就輪王如來悉地獲得無分別智住於普
現色身三摩地應同於一切群品示現無量種名號
以種種善巧方便成熟調伏一切世界一切有情自
他平等證成菩提

關住大悲願

釋文云拔濟利安樂

文云以自身

心口三金剛地水火風界周邊於無邊等虛空法界
與一切含識悅意受用之 亦云變化為帝釋有大
威神通拔濟諸惡趣地獄夜摩界餓鬼及傍生於城
邑聚落曠野及山林變化諸資具飲食妙卧具愍念

諸有情悉皆而供給施濟常作依怙三界度脫一切
衆生 亦云成佛悲為本 解教主曰不住生死不
住涅槃生死即涅槃故一切菩薩本誓在大菩提心
為因大慈大悲為根自利利他平等度脫一切衆生
證成等正覺妙果是故一切如來本願亦復如是住
大悲三昧化度方便無量信教諸衆本願亦復應當
如是

玄現章如來法要品第九

一切諸法本不生不可得故一一法門各具衆德一
切諸法萬德圓滿故一一法門皆悉最勝一切諸法
最勝無比故是為輪王如來無見頂法第一最勝無
見頂法本有常恒堅固故一切諸法無滅壞無常法

塵垢淨法無變移故一切諸法本無壞一一法門本
無壞故一切諸法本無塵一一法門本無塵故一切
諸法本無染一一法門本無染故一切諸法本淨如
虛空一一法門清淨如空故一切諸法本無壞一一
法門本無壞故一切諸法本清淨一一法門本清淨
故一切諸法本無染一一法門本無染故一切諸法
空淨不可得一一法門空淨不可得故一切諸法染
汙不可得一一法門染汙不可得故一切諸法塵垢
不可得一一法門塵垢不可得故一切諸法壞滅不
可得一一法門常恒無壞故一切諸法本不生不可
得一一法門不可得亦不可得故一切諸法最勝無
等比是為輪王如來無見頂法一一字門理教行果

等皆悉攝持故持頂輪者纔動一念三密即應頓滅
重罪速證菩提持頂輪者一舉舌端震動法界現身
安住蓮華藏國持頂輪者纔入三昧推破地獄度脫
群品出離三界持頂輪者佛加持故信解行證理教
行果決成圓滿持頂輪者佛加持故發心修行菩提
涅槃萬德具足持頂輪者佛加持故世間出世福智
二巖隨願即得持頂輪者佛加持故入阿字門速得
成就如來法身持頂輪者佛加持故入羅字門速得
成就如來報身持頂輪者佛加持故入婆字門速得
成就如來應身持頂輪者佛加持故入麼字門速得
成就如來化身持頂輪者差別平等一一法門本無
二故入門自在自在神力折伏攝受一切法門佛加

持故獲得無疑。若有一切善男善女至心隨喜於此
教卷敬視如佛受持讀誦書寫解說讚嘆供養合掌
恭敬當知是人金輪法王佛加持故十方諸佛十方
菩薩一切天等行住坐卧皆悉護衛智壽力年一切
徧行一切所願決成圓滿。若捨此身得生西方極樂
世界若生上方阿迦尼吒天宮密嚴淨土。若復有人
一心欲得無上佛慧應當受持輪王頂法常當供養
持頂輪者當知是人如來所使三界依怙。若復有人
讀誦此教回向惡趣受苦群品速得解脫決定往生
密嚴世界乃至證成佛妙色身。

玄現章流通品第十

阿吽鉢囉婆教攝萬法一字輪王之一字而法義無

盡一字者八萬四千大小顯密一切諸法之法要故
其威德福利廣大無邊說則永劫說之無盡無量今
為度末世有情故序品畧說教起名號品說人法不
二妙義實相品總說阿吽鉢囉婆教大旨本品畧說
所以開教門教關始門終門二品圓開門關發心安
心入門樞機故攝始十門稱發心品攝終十門號安
心品發心安心二品揭經文釋雙關更加畧解示門
關大意法要品說輪王如來法要今此流通品總說
本章大意以付囑一切三界信教諸衆一一之品一
一之門一一之關主伴互具輪環無端無始無終玄
義無盡正依傍依二門示所依本末教義教相教判
三門說門大綱顯本教要領宗旨門所以本教出現

末世離戲行戲論應機施化顯示安住實相法界無
上真實門本尊門示能化教主世尊折伏攝受二門
見輪王如來施化威德神力無身自在大悲方便圓
滿發心門示理密加持成佛義金輪法王如來三摩
地力所加持發菩提心故安心門示理事俱密加持
成佛義受金輪法王如來理事俱密灌頂成佛故開
示門見理具成佛義依加持佛恩自知理具佛性故
正行助行二門所以加持成佛果見信行菩提心日
日增進即是顯得成佛因行戒體積德二門所以助
成顯得成佛因行得益證入妙利應化四門顯得成
佛果證所化衆生證果各隨分顯現故由始一一九
門成第十發心門由第十發心門益信始九門信心

堅固發心亦益堅固由始第十發心門得終第一安心門得心決定安心亦益決定由終第一安心門證終一一九門證心圓滿攝護亦益圓滿本章一卷十品二十門四十關相即相融照應無窮開一關則開一切關得一門則得一切門成一品則成一切品今唯畧說餘門亦復如是輪王如來攝護力故受密嚴

灌頂受灌頂故入歡喜念誦三昧以念誦密嚴不思議力故如實知阿字菩提心此心初發時便成普現

色心三昧自在入諸佛三摩地於一切法無礙攝十門

開乃至一切萬法於此一句無身故離始終門關入定出定自在

自在故獲得十地乃至等正覺位於一念一念即一切念一切念即一念故攝無量永劫於一念無身一

行卽一切行一切行卽一行故攝一切徧行於一行
自在是謂一念證覺依金輪法王如來不思議神變
竒特大竒特加持威力得一念證覺妙果故是謂攝
護成佛畧說玄義顯現如是流布本教人天六趣一
切三界一切群品回施供養十方無邊界微塵刹土
中諸佛大海會法味無盡時權者說此教已白金色
光明普照十方已還至三匝入權者白毫相當入之
時密巖定中會上諸佛及一切大衆作禮歡喜信受
奉行

玄現章畢

爾時密巖定中會上一切大衆皆大歡喜還歸本宮
爾時權者將出定聞空中妙聲諸佛菩薩皆不現身

唱伽他曰

歸命禮天不
大日金輪佛頂尊
天不金輪佛頂尊
教主密巖正定中
以定速現佛頂身

三界教主大聖尊
釋迦金輪佛頂尊
三頂輪王不二故
速入輪王寶相定
亦現密巖華藏國

安住天不三摩地
十方佛土現光中
佛佛開演輪王法
一一妙理一一教
皆悉現於密巖定
多身同時現神通

白金色光照十方
光中亦現一切佛
一一妙聲一一字
一一妙行一一果
定中分身現多身
神通同執覺樹筆

明相現時刹那成

如是教卷玄現章

金剛薩埵蓮華掌

文殊師利菩薩等

天龍八部一切衆

皆悉證明發誓願

願我如來聖教旨

百千萬億無量劫

護持廣宣信受行

度脫三界諸衆生

安立如來祕密藏

如是讚美微妙音聲頂贊三界震動十方爾時權者

恭敬聽聞禮已出定

(教主定中以善提樹枝充筆)

勃駄阿吽鉢囉波婆教主

藏書之印
西華
田

西華
田
藏書之印

緣由

維時明治三十六年八月三日正當我

三界大教主勃馱阿吽鉢囉婆世尊成道七年之佳辰權外護

聖法輪位山縣勇三郎閑士與一切信教諸衆勸請

教主世尊為奉祝其佳辰故閑大法會於五股金剛杵湧出山

淨滿精舍此時善男善女從十方來集瞻仰

教主世尊光顏巍巍姿色悅豫歡喜之狀言文不可盡其一班

載在大法會執行記此日午前一時

教主世尊上金輪法王殿修瑜伽已入於輪王如來三摩地午

前四時玄現章現於輪王密嚴定中本章一卷十品二十門

四十關玄義無量闋教之本旨攝盡無餘始上殿時

教主世尊命侍者豫令具白絹硯墨菩提樹枝筆等於瑜伽道

場


教主世尊出定之後於金獅子殿手示之信教諸衆白絹十三
卷長即丈餘短即數尺整然數萬字菩提樹枝筆墨痕尚淋
漓一切信教諸衆熟視本經炳現親仰神力廣大皆悉歡喜
踊躍佛子鍍願與一切信教大衆普蒙教化茲請上梓頒之
信教大衆佛恩深廣無窮歡喜亦何極佛子鍍雖不能詳述
其實況

教主世尊下命故自不顧

淺劣謹奉記錄由如是

（玄現章炳現於教主
世尊定中四十分時間）

明治三十六年八月八日 受灌頂佛子法嗣鍍梓記



明治三十七年九月三十日印刷
明治三十七年十月三日發行
明治三十八年十二月廿三日印刷
明治三十八年十二月廿三日再版發行

著者

東京市小石川區關口臺町五拾五番地

三界大教主勃馱阿吽鉢囉婆

發行者

東京市小石川區關口臺町五拾五番地

西田 鏝

印刷者

東京市小石川區關口臺町五拾五番地

山縣勇三郎

印刷所

東京市小石川區關口臺町五拾五番地

白法精舍

終